

2 PEDRO

1 Simón Pedrojon, i winicon Jesucristo, apóstolon i cha'an. Mic ts'ijbubeñetla ili jun come junlajal tsa' aq'uentiyetla la' ñop Cristo quic'ot lojon. Come toj la caj Coltaya Dios, i c'aba' Jesucristo. Yom mi lac wen c'uxbin jini wen t'an woli ba lac ñop. ²La' p'ojlic i yutslel yic'ot i ñach'talel la' pusic'al come la' c'ñāγach Dios yic'ot lac Yum Jesús.

Tsa' aq'uentiyonla lac pusic'al lajal ba bajche' i cha'an Dios

³Ti ñuc ba i p'atālel Dios tsi' yaq'ueyonla pejtelel chuqui anto yom lac cha'an che' ba tsi' yaq'ueyonla laj can lac Yum Jesús cha'an mi la cajñel ti ch'ujul. Tsi' p'ayayonla cha'an mi laj camben i ñuclel yic'ot i yutslel. ⁴Jini cha'an tsi' yaq'ueyonla jini albil ba t'an, wen ñuc ba, c'ax uts'at ba. Che' mi la' ñopben i t'an mi' yaq'uetla ti coles ba' chuculetla ti' colosojlel la' pusic'al ti' wenta pañimil cha'an mi la' taj la' cuxtalel ch'oyol ba ti Dios. ⁵Jini cha'an yom mi la' cha'len wersa cha'an mi la' pas la' ba ti uts, come tsa'ix la' ñopo Dios. Che' utsetla yom wen ba la' ña'tabal. ⁶Che' an la' ña'tabal yom

mi la' tic' la' pusic'al. Che' mi la' tic' la' pusic'al yom mi la' cuch wocol ti xuc'ul. Che' mi la' cuch wocol ti xuc'ul yom mi la' tsictesan Dios. ⁷Che' mi la' tsictesan Dios yom mi la' p'untan la' pi'lob. Che' mi la' p'untañob yom mi la' c'uxbiñob. ⁸Mi che'ach mi la' mel mi caj la' p'at'an majlel. Mi caj i yutsi p'ojlel la' c'ajñibal. Che' jini mach lolomic jach tsa' la' c'ñā lac Yum Jesucristo. ⁹Jini mach ba anic mi' mel che' bajche' jini, xpots' yilal. Ma'anic mi' c'otel i wut. Mach c'ajalix i cha'an mi tsa'ix pocbenti i mul tsa' ba i mele ti yamba ora.

¹⁰Jini cha'an hermanojob, cha'lenla wersa cha'an mi' wen tsictiyel p'aybiletla, yajcābiletla. Mi che'ach mi la' mel, ma'anic mi caj la' yajlel. Ma'anic mi caj la' c'ay la' ñop. ¹¹Che' jini mi caj la' p'ajyel ochel ti' yumantel Dios mach ba anic mi' jilel, yic'ot lac Yum Jesucristo, Xcoltaya lac cha'an.

¹²Jini cha'an mi caj c chan c'ajtesabeñetla pejtelel jini t'an, anquese ña'tābilix la' cha'an, anquese xuc'chocobiletla ti' sujmllel woli ba la' ñop. ¹³Che' cuxulon to tic bac'tal mi cal uts'at mic chan xic'beñetla. Yom mic chan

c'ajtesabeñetla bajche' yom mi la' mel. ¹⁴Come cujil mach jalix mi caj j c ay c bac'tal che' mic chamel, che' bajche' tsi' subeyon lac Yum Jesucristo. ¹⁵Jini cha'an mic cha'len wersa ti la' tojlel cha'an mi la' ch an ña'tan jini t'an ti pejtelel ora che' chameñonix.

**Tsi' q'ueleyob i ñuclel
Cristo ti' wutob**

¹⁶Ma'anic tsac jop'o lojon maña jax ba t'an che' ba tsac subeyet lojon i p'at'alel lac Yum Jesucristo mu' ba caj i cha' tilel ti' ñuclel i yumantel, pero tsac subeyetla chuqui tsaj q'uele lojon yic'ot c wut. ¹⁷Ya' añon lojon ba' ora Dios tsi' yaq'ue i ñuclel i Yalobil. Tsa' yañi i wut ti' ñuclel Dios i Tat. Tsa cubibe i t'an Dios loq'uem ba ti' yumantel ti panchan che' ba tsi' yala: "Jiñach c'uxbibil ba Calobil. Tijicña mij q'uel", che'en. ¹⁸Tsa cubi lojon jini t'an ch'oyol ba ti panchan che' ya' añon lojon yic'ot Jesús ya' ti ch'ujul ba wits.

¹⁹Jini cha'an ñumen xuc'ulonla cha'an ti' t'an x'alt'añob, come woli ti ts'actiyel ti' tojlel lac wut. Yom mi la' wen p'is ti wenta i t'an, come lajalach i c'ajñibal bajche' lámpara mu' ba i pasbeñonla i sacel ti ac'alel jinto mi' sac'an pañimil, jinto mi' tsictiyel Cristo che' bajche' Ñoj Ec' ti la' pusic'al. ²⁰Ñaxan yom mi la' ch'amben isujm, ma'anic t'an ti' Ts'ijbujel Dios tsa' ba i bajñel ña'tayob jini x'alt'añob. Come jiñach Ch'ujul ba Espíritu tsa' ba i yaq'ueyob jini isujm ba i t'an Dios. ²¹Come c'alal ti' cajibal ma'anic tsi' bajñel cha'leyob t'an winicob

ti' bajñel pusic'al, pero jini ch'ujul ba winicob ñijc'abilo' ba i cha'an Ch'ujul ba Espíritu tsi' cha' subuyob chuqui tsi' yubiyob ti Dios.

**Lot ba x'alt'añob yic'ot lot ba
xcantesajob
(Judas 4-13)**

2 Pero tsa' tejchi lot ba x'alt'añob ti' tojlel israelob. Che' ja'el mi caj i tejchel lot ba xcantesajob ti la' tojlel. Ti mucul jach mi caj i yotsañob jini sojquem ba cantesa mu' ba i yaq'uetla ti sajtel. Woli' ñusañob lac Yum tsa' ba i mañayob. Woli' bac' rayob tilel i wocol mu' ba caj i jisañob. ²An cabalob mu' ba caj i jac'ob. Lajal mi' melob i ts'i'lel ti' colosojlel i pusic'al. Mi' yac'ob ti p'ajtal jini isujm ba bij. ³Wo'ob ti taq'uin jini xcantesajob, jini cha'an mi caj i lotiñetla cha'an mi' chilbeñetla la' chub'a'an. C'alal ti wajali c'alal wale ña'tabil mi caj i tojob i mul. Chajrabilix ba' mi caj i jilelob.

⁴Dios ma'anic tsi' ñusabeyob i mul ángelob tsa' ba i cha'leyob mulil. Tsi' chocoyob ochel ti c'ajc cha'an c'achal mi' c'aytalob ya' ti ic'ch'ipan ba pañimil c'alal ti' yorajlel toj mulil. ⁵Dios ma'anic tsi' p'unta jini pañimil ti oñiyi. Cojach tsi' colta Noé tsa' ba i subu i sujmllel ili t'an ti toj, yic'ot wuctiquil yaño' ba, che' ba tsi' choco tilel but'ja' cha'an mi' jisan xñusa Diosob ti pañimil. ⁶Tsi' junyajlel pulu Sodoma yic'ot Gomorra. Tsi' yac'la ti jisantel cha'an mi lac ña'tan ti pejtelelonla che'ach mi' yujtelob jini mach ba anic mi' bac'ñañob Dios. ⁷Pero tsi' colta loq'uel Lot jini toj ba

winic tsa' bΛ i wen mele i pusic'al cha'an i bibi'lel yic'ot i jontolil jini xñusa Diosob. ⁸Come an chuqui tsi' q'uele, an chuqui tsi' yubi jini toj bΛ winic che' ya' chumul yic'otob. Jini cha'an tsi' wen mele i pusic'al ti jujump'ejl q'uin cha'an i melbal jini mach bΛ tojobic. ⁹Che' ja'el lac Yum yujil i coltan jini ch'ujulo' bΛ che' woli' yilΛbentelob i pusic'al. Yujil ja'el i yΛc'ob ti toj mulil jini mach bΛ tojobic che' ti' yorajlel meloñel. ¹⁰Cojco jini mu' bΛ i jac'beñob i colosojlel i pusic'al yic'ot i bibi'lel, mu' bΛ i ts'a'leñob año' bΛ i ye'tel.

Ch'ejl mi' melob i bΛ. Mi' melob bajche' jach yomob ti' bajñel pusic'al. Ma'anic mi' bac'ñañob i cha'len t'an ti' contra jini año' bΛ i ñucllel ti panchan. ¹¹Jini ángelob am bΛ ñumen ñuc bΛ i p'ΛtΛlel yic'ot i ye'tel, ma'anic mi' cha'leñob t'an ti' contra jini jontolo' bΛ ti' tojlel lac Yum. ¹²Pero ili winicob mi' cha'leñob t'an ti' contra jini mach bΛ anic mi' ch'Λmbeñob isujm. Tontojob che' bajche' bate'el mu' bΛ i yilan pañimil cha'an mi' yajquel, cha'an mi' tsansΛntel. Mi caj i jilelob yic'ot i bibi'lel.

¹³Mi caj i q'uxetΛbentelob i jontolil. Tijicña mi' yubiñob che' woliyob ti leco bΛ q'uiñijel ti jujump'ejl q'uin. Bibi'ob jax. Año'ob i yoc'beñal. Wen tijicña mi' yubiñob cha'an i sajtemal che' mi' c'uxob waj la' wic'ot. ¹⁴But'ulob i pusic'al ti' ts'i'lel. Mach mejlic i cΛyob i mul. Mi' pΛyob ti mulil jini mach bΛ xuc'ulob i pusic'al. ÑΛmΛlobix i mel i ts'i'lel i wut. Chocbilobix ti Dios. ¹⁵Tsa'ix i cΛyΛyob jini toj bΛ bij. Sajtemob. Tsi' tsajcΛbeyob

majlel i bijlel Balaam, i yalobil Beor tsa' bΛ i mulΛbe i chobejtΛbal jontolil. ¹⁶Jini burro mach bΛ yujilic t'an tsa' caji ti t'an che' bajche' winic. Tsi' tic'be i tontojlel jini x'alt'an.

¹⁷Lajalob ili winicob bajche' tiquin bΛ i jol ja'. Lajalob bajche' tocal ñijcΛbil bΛ ti colem sutujt ic'. CΛybilobix ti c'ax ic'ic' bΛ ac'Λlel ti pejtelel ora. ¹⁸Mi' to'ol chañ'esañob i bΛ ti lolom jach bΛ. Ti bibi' bΛ i colosojlel i pusic'al mi' pΛyob ti mulil jini mu' bΛ cajel i ñopob Cristo, maxto bΛ jali tsi' cΛyΛ i tsajcañob i sajtemal i pi'Λlob.

¹⁹Che' chujquemob ti' mul mu' bΛ caj i jisañob, mi' lon subeñob yaño' bΛ bajche' mi caj i yΛc'ob ti coel. Come majqui jach mi' cha'len mulil chuculach ti' p'ΛtΛlel mulil ti' wenta xiba. ²⁰Che' mi' puts'elob loq'uel winicob ti' bibi'lel jini pañimil, che' mi' cΛñob lac Yum Jesucristo la caj Coltaya, mi tsa' cha' chujquiyob ti' bibi'lel, mi tsa' cha' yajliyob ti mulil, ñumen leco mi' yajñelob ti wi'il bajche' ti ñaxan. ²¹Uts'at machic tsi' cΛñΛyob jini toj bΛ bij, come che' bΛ tsi' cΛñΛyob, tsi' cha' cΛyΛyob jini ch'ujul bΛ t'an tsa' bΛ aq'uentiyob. ²²Tsi' cha'leyob che' bajche' mi' yal jini proverbio ti isujm: "Jini ts'i' mi' sutq'uin i bΛ cha'an mi' cha' mΛc' i xej. Che' pocbilix jini chitam mi' cha' jujc'un i bΛ ti oc'ol", che'en.

I q'uiñilel lac Yum

3 C'uxbibilet bΛ la, jiñlach i cha'q'uejlel carta tsa' bΛ c melbeyetla. Cha'yajl tsac chΛn xic'beyetla cha'an mi la' cha' ña'tan chuqui sac. ²Yom c'ajal la' cha'an

i t'an jini ch'ujul ba x'alt'añob ti oñiyi yic'ot i mandar lac Yum la caj Coltaya che' bajche' tsi' subeyetla jini apóstolob.

³Ñaxan yom mi la' ña'tan talob xwajleyajob ti wi'il ba q'uin tac. Mi caj i cha'leñob xambal ñumel ti pañimil ti' colosojlel i pusic'al. ⁴Mi caj i yalob: ¿Bacan tsiquil woli' cha' tilel che' bajche' tsi' yalal? C'alal che' ba tsa' ch'amiyob lac ñojte'el c'alal wale, lajal woli' chan ajñel pejtelel chuqui tac an che' bajche' ti' cajibal pañimil, che'ob. ⁵Mach yomobic i p'is ti' wenta bajche' tsa' ajni panchan ti wajali. Ti' t'an jach Dios tsi' mele pañimil. Jini lum tsa' loq'ui ti ja', joyolach ti ja'. ⁶Yic'ot ja' tsa' jejmi jini pañimil am ba ti oñiyi ti' yorajlel but'ja'. ⁷Ti jini jach ba i t'an Dios woli' cantantel jini panchan yic'ot pañimil am ba wale cha'an mi' pulel ti c'ajc ti' q'uiñilel melo' mulil, che' mi' tojob i mul jini winicob x'ixicob mu' ba i ñusañob Dios.

⁸C'uxbibilet ba la, ña'tanla junlajal mi' q'uel jump'ejl q'uin lac Yum bajche' ojlil i yuxbajc' (1000) jab. Che' ja'el, junlajal mi' q'uel ojlil i yuxbajc' jab bajche' jump'ejl q'uin. ⁹Lac Yum ma'anic mi' jalitesan i mel chuqui albil i cha'an che' bajche' mi' lon alob cha'tiquil uxtiquil. Woli' pijtañonla come mach yomic mi' sajtel mi juntiquilic. Yom mi laj cay lac mul ti lac pejtelel.

¹⁰Mi caj i tilel i q'uiñilel lac Yum che' bajche' xujch' ti ac'alal. Ti c'am ba i t'an mi' caj ti jilel panchan. Mi' caj ti ulmal ti c'ajc pejtelel chuqui tac an. Mi' caj ti laj pulel

pañimil yic'ot pejtelel melbil tac ba ti pañimil. ¹¹Mi che'ach mi' caj ti ulmal ti pejtelel, ¿bajche' yom mi la' wajñel che' jini? Yom ch'ujuletla. Yom toj la' melbal. ¹²Yom ch'ejl la' pusic'al mi la' pijtan i q'uiñilel Dios. Yom baxetla ti' ye'tel Dios cha'an mi' bac' tilel jini q'uin. Jiñach jini q'uin che' mi' caj ti ulmal panchan ti c'ajc. Pejtelel chuqui tac an mi' caj ti ulmal che' mi' pulel ti c'ajc. ¹³Woli lac pijtan tsiji' ba panchan yic'ot tsiji' ba pañimil ba' mi' mejlel chuqui toj che' bajche' albil i cha'an Dios.

¹⁴Jini cha'an c'uxbibilet ba la, che' woli la' pijtan jini q'uin, yom mi la' cha'len wesa cha'an mi la' wajñel ti ch'ujul cha'an saquetla, cha'an ñach'al la' pusic'al che' mi' tajetla Jesús. ¹⁵Ña'tanla woli ti pijt lac Yum jinto mi' coltantelob winicob x'ixicob. Che'ach tsi' ts'ijbubeyetla ja'el jini c'uxbibil ba la quermano Pablo che' bajche' Dios tsi' cantesa. ¹⁶Che'ach tsi' ts'ijba Pablo ti pejtelel i jun. An wocol tac ba mach ba wen tsiquilic i sujmllel mach ba orajic mi lac ch'amben isujm. Jini mach ba añobic i ña'tabal yic'ot jini mach ba xuc'ulobic mi' socbeñob i sujmllel che' bajche' mi' socbeñob yamba i Ts'ijbujel Dios. Woli' bajñel chocob i ba ti toj mulil.

¹⁷Jini cha'an c'uxbibilet ba la, come tsa'ix la' wubi tal toj mulil, tsajiletla ame lotintiquetla ame la' ñopben i sojquemal jini xjontolilob, ame la' cay la' ñop chuqui isujm. ¹⁸Yom mi la' taj la' colel ti Cristo che' mi la' camben i yutslel i pusic'al yic'ot i ña'tabal lac Yum Jesucristo la caj Coltaya. La' subentic i ñuclel wale yic'ot ti pejtelel ora. Amén.